

西使記
招捕總錄
庚申外史
元朝征緬錄



西

使

記

劉
郁
撰

中
華
書
局

叢書集成初編所選古今說海
歷代小史學海類編學津討原
及畿輔叢書皆收有此書學海
本較佳故據以排印並錄學津
本所載提要於後

四庫全書提要

西使記一卷。元劉郁撰。郁，眞定人。是書記常德西使皇弟錫里庫軍中往返道途之所見。王恽嘗載入玉堂雜記中。此蓋別行之本也。元史憲宗紀二年壬子秋，遣錫喇征西域蘇丹諸國。是歲錫喇薨。三年癸丑夏六月，命諸王錫里庫及烏蘭哈達帥師征西域法勒噶巴、哈台等國。八年戊午，錫里庫討回回法勒噶巴平之。擒其王，遣使來獻捷。考世系表，睿宗十一子，次六曰錫里庫，而諸王中別無錫喇。郭侃傳，侃壬子從錫里庫西行，與此記所云壬子歲皇弟錫喇統諸軍奉詔西征，凡六年，拓境幾萬里者相合。然則錫喇卽錫里庫，因元史爲明代所修，故譯音譌舛，一以爲錫喇，一以爲錫里庫，誤分二人。而憲宗紀二年書錫喇薨，三年重書錫里庫西征，遂相承誤載也。此記言常德西使在己未正月，蓋錫里庫獻捷之明年。所記雖但據見聞，不能考證古蹟，然亦時有異聞。郭侃傳所載，與此略同。惟譯語時有譌異耳。我皇上神武奮揚，戡定西域，崑崙月窟盡入版圖，計常德所經，今皆在屯田列障之內。業已欽定西域圖志，昭示億齡，郁所紀錄，本不足道。然據其所述，亦足參稽道里，考證古今之異同，故仍錄而存之也。

西使記

元 劉郁撰

壬子歲皇弟旭烈統諸軍奉詔西征。凡六年拓境幾萬里。己未正月甲子常德字仁馳驛西覲。自和林出兀孫中。西北行二百餘里。地漸高。入站經瀚海。地極高寒。雖暑酷雪不消。山石皆松文。西南七日過瀚海。行三百里。地漸下。有河闊數里。曰昏木釐。夏漲以舟楫濟。數日過龍骨河。復西北行。與別失八里南以相直。近五百里。多漢民。有二麥黍穀。河西注瀚爲海。約千餘里。曰乞則里八寺。多魚可食。有輟磴。亦以水激之行。漸西有城曰業嘴。又西南行過李羅城。所種皆麥稻。山多柏。不能殊。絡石而長。城居肆圉。開錯土屋。窗戶皆琉璃。城北有海。鐵山風出。往往吹行人墮海中。西南行二十里。有關曰鐵木兒懺察。守關者皆漢民。關徑崎嶇似棧道。出關至阿里麻里城。市井皆流水交貫。有諸果。唯瓜蒲萄石榴最佳。回紇與漢民雜居。其俗漸染。頗似中國。又南有赤木兒城。居民多并汾人。有獸似虎。毛厚金色。無文。善傷人。有蟲如蛛。毒中人。則煩渴。飲水立死。惟過醉蒲萄酒。吐則解。有畜酒李羅城。迤西金銀銅爲錢。有文而無孔。方至麻阿中。以馬牽拖牀。遞鋪負重而行疾。或曰乞里乞四。易馬以犬。二月二十四日過亦塔兩山間。土平民夥。溝洫映帶。多故壘墳垣。問之。蓋契丹故居也。計其地去和林萬五千里而近。有河曰亦連。流洶洶東注。土人云。此黃河也。二十八日過塔刺寺。三月一日過賽藍城。有浮圖諸回紇祈拜之所。三日過別石蘭。諸回紇貿易如上已節。四日過忽章河。渡船如弓鞋然。土人云。河源出南太山。地多產玉。疑爲崑崙山。以西多龜。

蛇行相雜。郵亭客舍。髣如浴室。門戶皆以琉璃飾之。民賦歲止輸金錢十文。然貧富有差。八日過楊思千城大而民繁。時羣花正開。惟梨花薔薇玫瑰如中國。餘多不能名。城之西所植皆蒲萄粳稻有麥亦秋種。滿地產藥十數種。皆中國所無。藥物療疾甚效。曰阿只兒。狀如苦參。治馬鼠瘡。婦人損胎及打撲內損。用豆許嚙之自消。曰阿息兒。狀如地骨皮。治婦人產後衣不下。又治金瘡膿不出。嚼碎傅瘡上。卽出。曰奴哥撒兒。形似桔梗。治金瘡及腸與筋斷者。嚼碎傅之自續。餘不能盡錄。十四日過暗不河。夏不雨。秋則雨。溉田以水。地多蝗。有鳥飛食之。十九日過里丑城。其地有桑棗。征西與魯屯駐於此。二十六日過馬蘭城。又過納商城。草皆苜蓿。藩籬以柏。二十九日過滯墁兒城。滿山皆鹽。如水晶狀。近西南六七里。新得國曰木乃奚。牛皆駝峰黑色。地無水。土人隔山嶺鑿井。相沿數十里。下通流以溉田。所屬山城三百五十已。而皆下。惟檐塞西一山城名乞都不。孤峰峻絕。不能矢石。丙辰年王師至城下。城絕高險。仰視之。帽爲墜。諸道竝進。敵大驚。令相大者納失兒來納款。已而兀魯兀乃算灘出降。算灘猶國王也。其父領兵別據山城。令其子取之。七日而陷。金玉寶物甚多。一帶有直銀千笏者。其國兵皆刺客。俗見男子勇壯者。以利誘之。令手刃父兄。然後充兵。醉酒扶入窟室。娛以音樂美女。縱其欲數日。復置故處。既醒。問其所見。教之能爲刺客。死則享福如此。因授以經咒日誦。蓋使盡其心志。死無悔也。令潛使未服之國。必刺其主而後已。雖婦人亦然。其木乃奚在西域中最爲兇悍。威脅鄰國。霸四十餘年。王師既克。誅之無遺類。四月六日過訖立兒城。所產蛇皆四跖。長五尺餘。首黑身黃。皮如鯊魚。口吐紫鹽。過阿刺丁城。樞哨蒼兒人被髮。率以紅帕。

勒首衣青如鬼然。王師自入西域。降者幾三十國。有佛國名乞石迷西。在印毒西北。蓋傳釋迦氏衣鉢者。其人儀狀甚古。如世所繪達摩像。不茹葷酒。日啖糲一合。所談皆佛法。禪定至暮方語。丁巳歲。取報達國。南北二千里。其王曰合法里。其城有東西。城中有大河。西城無壁壘。東城固之以甃。繪其上甚盛。王師至城下一交戰。破勝兵四十餘萬。西城陷。皆盡屠其民。尋圍東城。六日而破。死者以數十萬。合法里以舸走。獲焉。其國俗富庶。爲西域冠。宮殿皆以沈檀烏木降真爲之。壁皆以黑白玉爲之。金珠珍貝不可勝計。其后妃皆漢人所產。大珠曰太歲彈。闌石瑟瑟。金剛鑽之類。帶有直十金者。其國六百餘年。傳四十主。至合法里而亡。人物頗秀於諸國。所產馬名脫必察。合法里不悅。以橙漿和糖爲飲。琵琶三十六絃。初合法里患頭痛。醫不能治。一伶人作新琵琶七十二絃。聽之立解。土人相傳報達諸胡之祖。故諸胡皆臣服。報達之西馬行二十日。有天房。內有天使神。胡之祖葬所也。師名辦顏八兒。房中懸鐵絙。以手捫之。心誠可及。不誠者竟不得捫。經文甚多。皆辦顏八兒所作。轄大城數十。其民富實。西有密乞兒國。尤富地產金。人夜視有光處。誌之以灰。翌日發之。有大如棗者。至報達六千餘里。國西卽海。海西有富浪國。婦人衣冠如世所畫菩薩狀。男子胡服。皆善寢。不去衣。雖夫婦亦異處。有大鳥駝蹄蒼色。鼓翅而行。高丈餘。食火。其如升許。其失羅子國出珍珠。其王名奧思。阿塔卑云。西南海也。探珠盛以革囊。止露兩手。腰絙石墜入海。手取蚌并泥沙貯於囊中。遇惡虫以醋噴之。卽去。既得蚌滿囊。絙舟人引出之。往往有死者。印毒國去中國最近。軍民一千二百萬戶。所出細藥大胡桃珠寶烏木難舌寶鐵諸物。國中懸大鐘。有訴者擊之。司鐘者

紀其事及時。王官亦紀其名以防姦欺。民居以蒲爲屋。夏大熱。人處水中。己未年七月。兀林國阿早丁算灘來降。城大小一百二十。民一百七十萬。山產銀黑。契丹國名乞里。王名忽教馬丁算灘。聞王大賢亦來降。其拔里寺大城。獅子雄者鬚尾如纓拂。傷人吼則聲從腹中出。馬聞之怖溺血。狼有鬚孔。雀如中國畫者。惟尾在翅內。每日中振羽。香貓似土豹。糞溺皆香如麝。鸚鵡多五色。風駝急使乘日可千里。鵝鵲傳日亦千里。珊瑚出西南海。取以鐵網。高有至三尺者。蘭赤生西南海山石中。有五色。鴨思價最高。金剛鑽出印毒。以肉投大澗底。飛鳥食其肉。糞中得之。撒八兒出西海中。蓋瑋瑁之遺精。蛟魚食之吐出。年深結成。價如金。其假者。卽犀牛糞爲之也。骨篤犀大蛇之角也。解諸毒。龍種馬出西海中。有鱗角。牝馬有駒不敢同牧。被引入海不復出。阜鷗一產三卵。內一卵生大灰色而毛短。隨母影而走。所逐禽無不獲者。鰐種羊出西海。以羊臍種土中。既以水。開雷而生。臍系地中。及長。驚以木。臍斷便行。嚼草至秋可食。臍內復有種。又一胡婦解馬語。卽知吉凶甚驗。其怪異等事不可殫紀。往返凡一十四月。郁款曰。西域之開。始自張騫。其土地山川固在也。然世代浸遠。國號變易。事亦難考。今之所謂瀚海者。卽古金山也。印毒卽漢身毒也。曰駝鳥者。卽安息所產大馬。爵也。密昔兒卽唐拂菻地也。觀其土產風俗可知已。又新唐書載拂菻去京師四萬里。在西海上。所產珍異之物。與今日地里正同。蓋無疑也。中統四年三月記。

